

- प्रदेश रा सात विधानसभा हलकां मांय उप-चुनाव सारु आज शांति ऊं वोट पड़्या- सिंज्या पांच बज्यां ताई 64 दशमलव आठ दो फीसदी मतदाता वोट दीना।
- प्रधानमंत्री नरेन्द्र मोदी देश रा न्यारा-न्यारा रेलवे टेसनां माथे 18 प्रधानमंत्री भारतीय जन औषधि केन्द्रां री सरुआत कीनी- राजस्थान रा तीन टेशन ई शामिल।
- सुप्रीम कोर्ट बुलडोजर कार्रवाई ने चुनौती देवण वाळी अर्जियां माथे खास फैसलो सुणायो।
- केन्द्रीय उपभोक्ता संरक्षण प्राधिकरण कोचिंग संस्थानां ने भरमावण वाळा विज्ञापन देवण माथे रोक लगावण सारु दिशा-निर्देश जारी कीना।

000

प्रदेश री सात विधानसभा सीटां माथे उपचुनाव सारु वोट देवण रो काम अब ऊं थोड़ी देर पैली पूरो व्हे ग्यो। आज दौसा, रामगढ़, झुंझुनू, चौरासी, खीवसर, देवली-उनियारा अर सलूबर विधानसभा हलकां मांय उपचुनाव सारु वोट देवण रो काम सिंज्यां छह बजां ताई चाल्यो, हालांकि तैय बगत ताई मतदान केंद्रां मांय दाखिल व्हेवण वाळा मतदातावां ने वोट देवण री मंजूरी दीरीजी। निर्वाचन विभाग ऊं मिली जाणकारी रे मुजब सात ई चुणाव हलकां मांय सिंज्यां 5 बजां ताई 64 दशमलव आठ दो फीसदी वोट पड़्या। खीवसर मांय 71 दशमलव शून्य चार, देवली-उनियारा मांय 60 दशमलव छह एक अर सलूबर मांय 64 दशमलव एक नौ फीसदी वोट पड़्या। दौसा मांय 55 दशमलव छह तीन फीसदी, रामगढ़ मांय 71 दशमलव चार पांच, झुंझुनू मांय 61 दशमलव 8 अर चौरासी मांय 68 दशमलव पांच पांच फीसदी वोट पड़्या। छुटपुट घटनावां ने छोड़ र घणखर ठौड़ां शांति ऊं वोट पड़बा रा समाचार है। मतदातावां मांय वोट देवण सारु उमाव निजर आयो। केई ठौड़ां बींद-बींदणी देवउठनी ग्यारस रे मौके व्हा ब्याह पाछे वोट देवण ने पूर्या। दौसा जिला मांय कालोता मतदान केंद्र परां तीन बींद एके सागे वोट देवण ने आया। दौसा मांय ई कुछ मतदान केंद्रां माथे महिलावां लोकगीत गाती थीं मतदान केंद्र पूगी। डूंगरपुर जिला रा सीमलवाड़ा मांय पर्यावरण री हिफाजत रो संदेश देवण वाळो मतदान केंद्र बणायी ज्यो। देवली-उनियारा विधानसभा हलका रा समरावता गांव रा मतदान केंद्र मांय निर्दलीय उम्मीदवार नरेश मीणा उपखंड अधिकारी सागे मारपीट कीनी ज्यो पाछे वठे हंगामो व्हे ग्यो। टोंक री जिला निर्वाचन अधिकारी सौम्या झा बतायो के समरावता मांय गांव वाळा वां रा गांव ने देवली री बजाय उनियारा तहसील मांय जोड़बा री मांग करता थकां वोट देवण रा काम रो बहिष्कार कर र धरनो दे रह्या हा। वां सागे निर्दलीय उम्मीदवार ई मौजूद हा। नरेश मीणा बूथ माथे जा र एरिया मजिस्ट्रेट अर मालपुरा रा एसडीएम अमित चौधरी सागे मारपीट कीनी। वे बतायो के मामला री जांच करी जा रही है अर जांच रपट रे मुजब कानूनी कार्यवाही सारु आगे लिख्यो जावेला। दूजी कानी आरएएस एसोसिएशन रा नुमाइंदां रो एक दल मुख्य निर्वाचन अधिकारी नवीन महाजन सागे मुलाकात कर र घटना री निंदा कीनी अर आरोपित रे खिलाफ कार्यवाही री मांग कीनी। म्हाणा खबरनवीस बतायो के ई उप-चुनाव मांय केई दिग्गज नेतावां री साख दांव माथे है।

000

प्रधानमंत्री नरेन्द्र मोदी आज देशभर रा न्यारा-न्यारा रेलवे टेसनां माथे 18 प्रधानमंत्री भारतीय जन औषधि केंद्रां री सरुआत कीनी। वे बिहार रा दरभंगा ऊं वीडियो कांफ्रेंस रे मार्फत देश मांय सड़क, रेलवे अर स्वास्थ्य समेत न्यारा-न्यारा हलकां री 12 हजार करोड़ रुपया ऊं बत्ती रकम री 25 ऊं बत्ती परियोजनावां सागे आं केद्रां री सरुआत कीनी। अ केंद्र मुसाफिरां सारु रेलवे टेसनां माथे सस्ती दवाइयां मिलणो तैय करेला। प्रधानमंत्री कार्यक्रम रे दौरान जयपुर मांय दुर्गापुरा रेलवे टेशन, बाड़मेर अर फालना रा रेलवे टेशन माथे प्रधानमंत्री भारतीय जन औषधि केन्द्र री वर्चुअल तरीका ऊं सरुआत कीनी। ई मौके प्रधानमंत्री कह्यो के केन्द्र सरकार विकसित भारत बणावण री दिशा मांय तेजी ऊं काम करण सागे देश मांय स्वास्थ्य सेवावां मांय बधोतरी करण अर वां ने मजबूत बणावण माथे खास ध्यान दे रही है। वे कह्यो के केन्द्र सरकार कानी ऊं चलाया जा रह्या फिट इंडिया मूवमेंट, स्वच्छ भारत अभियान, हर घर नल से जल सरीखा अभियानां ऊं न केवल साफ-सफाई बधी है बल्कि बीमारियां माथे ई काबू करी ज्यो है।

-----

मुख्यमंत्री भजनलाल शर्मा ई कार्यक्रम मांय वां रा रेहवास ऊं वीडियो कॉन्फ्रेंस रे मार्फत सिरकत कीनी। वे कह्यो के सड़क, ऊर्जा, मेडिकल, उद्योग, बिजली, पाणी, शिक्षा अर सूचना प्रौद्योगिकी समेत न्यारा-न्यारा विकास संकेतकां मांय भारत मजबूती सागे आगे आयो है। वे कह्यो के वां रा राज मांय स्वास्थ्य सेवावां ने बधावो देवण सारु लगातार फैसला कर्या जा रह्या है।

000

सुप्रीम कोर्ट फैसलो दीनो है के कार्यपालिका, लोगों री संपत्ति ने तोड़ र वां रा अपराध ने तैय करण मांय न्यायपालिका रा तौर ऊं काम नी कर सके है। आरोपित लोगों रे खिलाफ़ "बुलडोजर कार्रवाई" रे खिलाफ़ दायर अर्जियां री सुणवाई रे दौरान अदालत कह्यो के उचित प्राधिकार बगैर किण ई संपत्ति ने तोड़बा ने मनमानी कार्रवाई मानी जावेला। सुप्रीम कोर्ट लोकतांत्रिक शासन री नींव रा रुप मांय कानून रा राज माथे ज़ोर दीनो। दो जजां री पीठ संपत्तियां ने ना हक तोड़बा ऊं रोकण सारु दिशा-निर्देश ई जारी कीना। अदालत कह्यो के कारण बताओ नोटिस बगैर कोई संपत्ति नी तोड़ी जावणी चाहिजे। सुप्रीम कोर्ट कह्यो के नामित प्राधिकारी ने प्रभावित पक्ष ने व्यक्तिगत सुणवाई रो मौको ज़रूर देवणो चाहिजे अर सुणवाई री जाणकारी विधिवत दर्ज करी जावणी चाहिजे। अदालत वां रा हुकम मांय ओ ई कह्यो के तोड़-फोड़ री कार्रवाई री वीडियो रिकॉर्डिंग कर र वां ने संभाळ र राखणी चाहिजे, जिला कलेक्टर ने जाणकारी दी जावणी चाहिजे अर डिजिटल पोर्टल माथे बतायी जावणी चाहिजे।

000

केंद्रीय उपभोक्ता संरक्षण प्राधिकरण सगळा कोचिंग संस्थानां ने वां रा विद्यार्थियां अर कोर्स रा बारा मांय प्रासंगिक जाणकारी देवण बाबत कह्यो है ताकि वां ने अर वां रा मायतां ने गुमराह व्हेवण ऊं बचाया जा सके। उपभोक्ता मामलात सचिव निधि खरे कोचिंग संस्थानां कानी ऊं भरमावण वाळा विज्ञापन देवण रे खिलाफ़ दिशा-निर्देश ई जारी किए। दिशा-निर्देशां रे मुजब कोचिंग संस्थानां ने वां री सेवा, सुबीतां अर बुनियादी ढांचा रा बारा मांय सही जाणकारी देवणी चाहिजे। निधि खरे कह्यो के कोचिंग संस्थानां कने एक सक्रिय उपभोक्ता शिकायत निवारण तंत्र व्हेवणो चाहिजे। वे बतायो के राष्ट्रीय उपभोक्ता हेल्पलाइन सारु व्हेयां पाछे लारला साल सितम्बर ऊं ई साल अगस्त महीना ताई कोचिंग संस्थान एक करोड़ रुपया ऊं बत्ती रकम विद्यार्थियां ने पाछी दीनी है।

000

मध्यप्रदेश रा मुख्यमंत्री मोहन यादव आज एक निजी कार्यक्रम मांय सिरकत करण सारु कोटा पधार्या। ई दौरान वे कोचिंग संस्थानां मांय पढ़ रह्या मध्यप्रदेश रा विद्यार्थियां सागे चर्चा कीनी। वे कह्यो के नाकामयाबी री सूरत मांय निराश नी व्हेवणो चाहिजे। यादव कह्यो के इच्छा शक्ति मज़बूत व्हेवण री सूरत मांय चुनौती रा काम पूरा कर्या जा सके है। इण ऊं पैली कोटा हवाई अड्डा माथे ऊर्जा मंत्री हीरालाल नागर मध्यप्रदेश रा मुख्यमंत्री रो स्वागत कीनो।

000

भरतपुर जिला रा बांध बरैठा ऊं किसानां ने सिंयाळू साखां री पाणत सारु 15 नवम्बर ऊं पाणी देवण रो फैसलो करी ज्यो है। बांध बरैठा जल वितरण उपयोग समिति री ज़िला कलेक्टर डॉ. अमित यादव री सदरत मांय व्ही मीटिंग मांय कलेक्टर समिति रा सदस्यां ऊं नहरां मांय पाणी छोड़्यो जावण रे दौरान निगराणी राख र जल संसाधन विभाग री मदद करण बाबत कह्यो।

000

पंचायतीराज मंत्रालय री ओर ऊं काल नई दिल्ली मांय धन आवंटन से विकास मुद्दा माथे वित्त आयोग रो सम्मेलन राख्यो जावेला। 16वां वित्त आयोग रा अध्यक्ष डॉक्टर अरविंद पनगढ़िया री अगुवाई मांय व्हेवण वाळा ई सम्मेलन मांय गांवाई हलकां रा स्थानीय निकायां सारु धन रा असरदार तरीका ऊं आवंटन मांय राज्य वित्त आयोगां री भूमिका रा बारा मांय चर्चा करी जावेला। सम्मेलन मांय 16वां वित्त आयोग रा सदस्य, पंचायती राज मंत्रालय, वित्त मंत्रालय अर आवासन अर शहरी कार्य मंत्रालय रा अहलकार सिरकत करेला।

000

सांचौर जिला मांय आज पीएम सूर्य घर मुफ़्त बिजली योजना रा तहत शिविर लगायी ज्या। सांचौर रा जूना पॉवर हाउस अर हाड़ेचा गांव मांय अटल सेवा केंद्र माथे लगायी ज्या शिविरां मांय 30 जणा मौके ई नाम मंडाया। जिला री सांचौर, रानीवाड़ा अर चितलवाना पंचायत समिति हलकां मांय अ शिविर लगाया जा रह्या है।

000